

Date – 23/06/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoram sorkarin Cyclone Remal tihchhiat thawm that na'n cheng vaibelchhe 237 leh nuai 6 senna tur ruahmanna a duang.
2. Mizorama Myanmar raltlan 33,000 chuangte biometric data laksak turin Mizoram sorkar a inpeih.
3. Lok Sabha 18-na thutkhawm hmasa ber, naktukah tan a ni dawn.
4. NEET exam-a thil fello tam tak awm nia sawi chungchangah CBI-in FIR a thehlut.



DISASTER FUND

Disaster Management and Rehabilitation Minister Pu K. Sapdanga chuan Mizoramin Cyclone Remal tihchhiat thawm that na'n cheng vaibelchhe 237 leh nuai 6 senna tur ruahmanna duan a ni, a ti.

Nimin chawhnu khan Aijal Club-ah Central Ministry hrang hrang aiawh, Inter-Ministerial Team leh Mizoram Sawrkar hnuai a kaihnawih department hrang hrang hotute an thukhawm a. Central leh State Sawrkar aiawh te hian Mizoram hmun hrang hranga Cyclone Remal avanga chhiatna thleng chungchang an sawiho ani. Pu K. Sapdanga chuan Central Team lawmna thu leh Mizoramin Cyclone Remal avanga chhiatna lian tham a tawh dan te, kawngpui, tuilakna, electric hruipui leh khawl chhia siamthat ngai te bakah tuilianin thlawhmma a tih chhiat dan te a sawi a. Mizoramin Cyclone Remal a tawrhna chu rin phak baka nasa a nih thu leh central Team in a hmun ngeia an rawn endik thei chu lawmawm a tih thu a sawi a ni. Tuna chhiatna lo thlengah hian nunna hlu tak 34 chan a nih bakah thil tihchhiat a neih nasat thu pawh sawiin, heng hmunhmma leh hmanraw chhiate siamthatna atan hian cheng tam tak sen a ngai dawn tih sawi a. SDRF leh NDRF rate angin mamawh te chhutchhuah a, ngenna siam a ni a ti.

Chief Minister Pu Lalduhoma'n Union Home Minister Amit Shah hnenah hemi chungchangah hian Memorandum a theh lut tih a sawi bawk. Thutkhawm hi Chief Secretary Dr Renu Sharma in a kaihruaia. DM&R, PWD, PHED, P&ED, Agriculture leh Horticulture Department ten Mizoram hmun hrang hranga chhiat rupna a lo thlen dan te leh siamthat hna thawhna tura mamawh zat te chiang takin an tarlang.

Thutkhawm nei zawh hian a huhovin Melthum, Hlimen, Kulikawn leh ITI venga chhiatrupna thlenna hmun te a an endik a ni.

(DIPR)



MLA FUND

Mizoram MLA-te'n an bial chhunga hmasawna hna an thawhna tur MLA local area fund chu kumin atang hian MLA pakhat zelin cheng nuai 200 an hmang thei tawh dawn.

Tun hnai a Planning and Programme Implementation department-in hriattirna a tihchhuahah MLA tinin an bial hmasawna atana kumtina sum an hman theih cheng nuai 150 ni thin chu cheng nuai 50 a tipungin cheng nuai 200 a ni tawh dawn tih an tarlang a. A punna hi za zelah 33 chuang a ni. MLA fund tihpun a nih avang hian Mizoram sorkar chuan kumtin cheng vaibelchhe 20 a sen belh dawn a. Kum hmasa lama kum tin cheng vaibelchhe 60 sen thin chu cheng vaibelchhe 80-in a pung dawn a ni. MLA fund tihpun tur chungchang hi kumin January ni 8-a legislative party tin aiawh telna General Purpose Committee (GPC)-in thutlukna a lo siam tawh zulzui a kalpui a ni a. Finance department-in a pawm hnu-ah Planning department hian hriattirna a chhuah ta a ni.

Kumin February ni 27 a kum 2024-25 budget a pharh paha a thusawi-ah Chief Minister Pu Lalduhoma chuan hei hi a sawi lang lo na chungin budget (Annual Financial Statement)-ah erawh tarlan a ni tawh a ni.

(Desk)



BIOMETRIC DATA

Mizorama Myanmar raltlan 33,000 chuangte biometric data laksak turin Mizoram sorkar a inpeih.

Home department hotute sawi dan chuan Myanmar raltlante biometric enrollment kalpuina tur atan hian biometric enrollment portal pawh peih diam a ni tawh a. Sorkar laipui a Ministry of Home Affairs-in kalpui tura an tih hun hun a tipuitling thei turin Mizoram sorkar chu a inpeih tawh a ni. Myanmar raltlante chanchin (biographic) data hi neih kim thawkhat a ni tawh a, lut leh chhuak an awm reng avangin tih kim vek hleih theih a ni lo. Chuti chung chuan an vai deuh thaw-in identity card pek an nih tawh thu home department hotute chuan an sawi a. District 11 a bawrhsap pisa tinin an district chhunga raltlante dinhmun hi an ngaihven reng niin an sawi bawk. Chief Minister Pu Lalduhoma chuan Prime Minister leh Union Home Minister thurawn angin biometric enrollment portal hi peih fel a ni tawh a. Myanmar raltlante chu an rama muanna tluan tling a awm hma chuan kir tir an nih dawn loh thu Union Home Minister Amit Shah hian a tiam niin Pu Lalduhoma chuan a sawi a ni.

Home department-in a chhinchhiah dan thar berah chuan tun dinhmunah Myanmar raltlan hi mi 33,835 an awm a. Siaha district a awm mi 91-te an ramah an kir leh emaw hmun danga an kal emaw avangin raltlan awm zat hi a tlem hret a ni. Raltlan zinga 10,141 hi mipa an ni a, hmeichhia 10,793 leh naupang 12,901 an awm bawk. Myanmar raltlan zinga mi 10,552 hi an puala siam raltlan buk 111-ah an awm mek a, mi 9,269 te erawh chu an chhungkhat laina leh thiante belin an awm a. In luah a awm an awm bawk a ni.

Myanmar raltlan hi Champhai district-ah tam berin mi 14,212 an awm a, Siaha district-ah 5,953 awmin Lawngtlai district-ah 5,922 an awm bawk a ni. Kum 2021 February ni 1-a mipui thlan sorkar thar ding mai tur Myanmar sipai-in thuneihna an hnehchhuh hnu March thla bul atang khan Mizoramah an rawn tlanche tan a. Sipai sorkar dodaltute laka sipaiho an inlulin luat avang leh tualchhung indo puan a nih tak avangin a hnu-ah tam tak an rawn luh belh ta zel a ni. MNF sorkar khan biometric data lak kha inthlan vuakvet chhuanlamin a ti duh lova, tunah hian kalpui theih turin ruahmanna siam a ni ta a ni.

(Desk)

<><><>

CM

Delhi-a cham mek Chief Minister Pu Lalduhoma chuan nimin tlai khan NDA sorkar a Kristian Minister awm chhun Union Minister State for Fisheries, Animal Husbandry & Dairying, Minority Affairs, George Kurian chu a chennaah a tlawh.

African Swine Fever vawk pulhri-in Mizoram ran vulhtute harsatna a thlen nasat dan leh a tuartute chhawmdawlina neih a tul thu a thlen a. Union Minister chuan Chief Minister chu "Rehabilitation Scheme duang a chumi hnua tih dan a lo ngaihtuah pui tur thu leh ASF vanga ranvulhtute harsatna sutkianpui a tum thu a lo hrih niin sorkar thuchhuah chuan a tar lang a. Sangha tharchhuah lama Mizoram tihmasawn dan tur te pawh inpawh takin an sawi dun a ni.

Chief Minister hi Pu Jonathan Lalremruata, OSD to CM in a tawiawm a ni.

(DIPR)

<><><>

ASF UPDATE

Vawiinah African Swine Fever (ASF) vei vawk 14 a thih belh leh avangin Mizoram puma he vawk pulhri leng avanga kumina vawk thi zat chu 3,200 a tling tawh.

Animal Husbandry and Veterinary department hotute'n an sawi danin ASF vawk pulhri darh zel tur venna atan vawiin khan vawk 76 tihhlum a ni a. Kumina vawk pulhri darh tur venna atana vawk tihhlum tawh zawng zawng hi 6,222 a tling tawh a. Tun dinhmunah ASF vawk pulhri hi veng/khaw 119-ah a leng mek a ni. Vawiina vawk thite hi Khawzawl, Serchhip leh Kolasib district a thite a ni a. Vawiina vawk suatte hi Serchhip leh Khawzawl district-a khaw 6 amite a ni a. Khawzawl district a Chalrang khua-ah vawk 55 tihhlum a ni a, 'Chana Pawl' ti a hriat lar Chhuanthar kohhran mite awmkhawmna Serchhip district a Chhuanthar Tlangnuam khua-ah vawk 14 tihhlum a ni bawk a ni.

(Desk)

<><><>

ADC/VC POLLS

June ni 27 (Ningani) a Lai Autonomous District Council hnuai Village Council inthlanpui leh Lawngtlai Chandmary MDC by-election vote thlak turah vote zawn beihpui ngawrh taka kalpui mek a ni a, inthlan buaipuitu tur lam pawhin thil tul pawimawhte a tahtawlin an bawhzui chho mek a. LADC hnuai-ah hian Village Council 99 a awm a. VC member mi 595 thlan chhuah tur a ni dawn a, chu'ng zingah chuan mitin chuh theih 496 a awm bakah hmeichhe tana hauh seat 99 a awm bawk a ni. Candidate leh an mahni puitute'n intinah lutin beihpui an thlak ngawrh tawh hle.

Lawngtlai East assembly bial a thlan tlin a nih avanga Dr. Lorrain Lalpeklina Chinzah in a chhuahsan tak Lawngtlai Chandmary MDC by-election neih tur a chuhtute chu BJP atangin Pu K. Lalawmpuia, MNF atangin Pu C. Lalsawmzuala, ZPM atangin Pu F. Hrangtukhuma te an ni a. Congress party chuan Candidate nei lo in MNF candidate Pu C. Lalsawmzuala an puih dawn thu an sawi.

(Lalnggheta Ralte, PTC Lawngtlai)

<><><>

LOK SABHA SESSION

Naktukah hian Lok Sabha 18-na thutkhawm hmasa ber tan a ni dawn a, member tharte lak luh an ni ang a, Protem Speaker tura ruat, BJP MP, Bhartruhari Mahtab-a'n rinawmna thu tiam tirin a la lut ang.

Tun kar Nilaini-ah Lok Sabha Speaker thar tur thlanna neih a ni ang a, a tuk Ningani-ah President Droupadi Murmu-i'n Lok Sabha leh Rajya Sabha joint session-ah thu a sawi ang.

Rajya Sabha inkhawm hi tun thla ni 27, Ningani-ah neih tan a ni ang a, House 2 thutkhawm hi thla thar July ni 3-ah tih tawp a ni ang.

(NSD)

<><><>

NEET EXAM PAPER LEAK CASE

Medical college-a lut thei tur zawna, NEET-UG exam-a zawna put ru awm nia sawi chungchangah CBI-in FIR an thehlut a, CBI sawi danin, Education Ministry-in lungawilohna a thehluh bawhzuiin FIR hi an thehlut a, NEET exam kaihnnawiha ramchhung hmun hrang hranga thubuai thehluhte pawh CBI kuta awm turin ruahmanna siam mek a ni.

Hetih lai hian NEET exam buatsaihtu, National Testing Agency (NTA) Director General, Subodh Kumar Singh-a chu sawn chhuah a ni a, India Trade Promotion Organisation Chairman leh MD, Pradeep Singh Kharola chu a hna pangngai bakah NTA Director Genral mawhphurhna chelh tura ruat a ni.

NTA hian thla hmasa, May ni 5 khan ram pumah NEET exam hi a buatsaih a, zawna put ru bakah thil felhlel dang tam tak a awm nia sawi a ni.

(NSD)

<><><>

IMD FORECAST

Ni 4 lo awm tur chhung hian Kerala, Karnataka leh Goa-ah te, nasa takin ruah a sur thei tih India Meteorological Dept (IMD) chuan a sawi a, Tamil Nadu, Maharashtra leh Gujarat-ah te pawh ruah bakah tek-te pawh a tla thei a ni, a ti.

Madhya Pradesh, Chhhatigarh, Odisha, Gangetic West Bengal, Jharkhand, Bihar leh Uttar Pradesh chhak lam hmun engemawzatah ni 3 lo awm tur chhung hian fur ruah, tam zawkin a sur thei tih IMD chuan a sawi bawk a, hmar chhak bial leh West Bengal hmun thenkhatah ni 5 chhung chu nasa takin ruah a la sur zui theih tih a sawi bawk.

(NSD)

